

四庫全書

集部

欽定四庫全書

三華集卷七

明 錢子義 撰

種菊菴集一

邵陽胡氏詠史詩傳誦於世久矣馬孝常先生嘗
謂予曰胡公之詩多幽僻蹇淺欲就其舊題別作
一百五十篇以啜學子愚以胡詩固有淺而僻者
奈何兒童聽習之熟恐卒難改也不若別命題而

為之如何馬曰善及其出宰內丘四五年間意其
付之度外矣近因見族姪仲益佩小冊於張玄齋
處乃其手鈔湖海士君子之新作也而孝常詠史
詩在焉皆仍胡之舊題而新之也蓋向者與言之
後即以其已志而成之矣第余相去邈然不及知
之耳暇日翫咏之餘不自揣量窺竊陳篇類出黃
帝鼎湖已降洎趙宋厓山共一百五十題各述以
七言一首辭庸意陋固弗足齒於二公但欲備故

事百餘段授之童稚肄業之暇使之講習庶幾亦
有所補益云爾洪武八年歲次乙卯仲夏初吉種
菊菴錢子義序

續詠史詩上

鼎湖

鼎湖在括蒼仙都山下黃帝鑄鼎於此鼎成
有龍垂胡鬚下迎帝乃騎龍上天羣臣後宮
從者七十餘人

山遶仙都水遶厓晚涼風剪浪花開鼎成龍去無消息
時有飛雲送雨來

歷山

舜田于歷山象耕鳥耘堯以九男事之二女妻之百官牛羊倉廩備謂之曰都君帝館甥於貳室亦饗舜送為賓主乃禪以天下

野象能耕鳥解耘歸來甥館享都君三十年後尋遺跡
唯見青山吐白雲

臨潁

潁大夫廟在馬鄭莊公寘母武姜于城潁誓不相見後因潁考叔諫遂為母子如初君子曰潁考叔純孝也愛其母施及莊公

野廟荒涼啼老鳥剩松殘栢困樵蘇豐碑剝落難成誦
純孝人稱潁大夫

河上

衛宣公為其子伋娶於齊而聞其美欲自娶之乃作新臺於河上而要之遺址在澶州河上國人惡之作新臺之詩後宣公納伋之妻是為宣姜生子壽及朔朔與宣姜愬伋於公公令伋之齊使賊要之壽知之竊其節先往賊殺之及伋至曰君命殺我壽有何罪賊又殺之國人傷之作

二子乘舟之詩

衛君遺跡久塵埃二子乘舟去不來誰謂後王能蹈武

華清宮闕似新臺

唐玄宗奪其子壽王妃楊氏寵之專房作華清宮於溫泉

蕩陰里

齊公孫接田開疆古治子勇而無禮晏子請景公饋之二桃計功而食皆自殺諸葛

武侯梁甫吟曰步出城東門遙望蕩陰里里中有三墳累累正相似問是誰家墳田

疆古治子一朝被讒言二桃殺
三士誰能為此謀相國齊晏子

晏子謀齊計已深二桃殺士此何心東城門外荒墳在
慷慨誰歌梁甫吟

漁父亭

亭在滄浪水濱屈原既放於江潭漁父
見之曰云云漁父莞爾而笑鼓枻而去乃
歌曰滄浪之水清兮可以濯吾纓濁浪
之水濁兮可以濯吾足遂去不復與言

空亭慘落倚江雲濯足滄浪春水渾漁父不來天欲暝
一樽歸酌獨醒魂

函關

老子名耳字伯陽嘗乘青牛薄板車渡函谷
關關吏尹喜先望見紫氣而知之云子將隱

為我著書乃著道
德經五千言而去

函谷山高凌紫虛青牛曾此度輕車至人得道身將隱
不為求名更著書

遼東

遼東華表柱上忽有鶴集其上作人語曰有
客有客丁令威去家千年今始歸城郭如古
人民非何不

學仙冢累累

莫訝時人不學仙鶴歸華表事空傳秦皇漢武今何在

一一荒陵鎖暮烟

郭氏墟

齊桓公過郭氏墟問曰郭氏曷為墟野人
對曰善善惡惡公曰善善惡惡何以為墟

曰善善而不能行惡惡而不能去是以為墟也

善必能行惡必除優游不斷此何如興亡往事明於鑑

千古君看郭氏墟

乾溪

楚靈王奢縱狩于州來次乾溪右尹子革夕見王與之語云云子革對曰昔穆王欲肆其

心周行天下祭公謀父作祈招之詩以止王心為王誦之曰祈招之惜惜式昭德音思我王度式如玉式如金形民之力而無醉飽之心王揖而入不能自克以及於難

章華臺下草蕭蕭又向乾溪佇客橈惆悵楚靈終不悟

謾勞子革誦祈招

綿上

晉文公將入國至及河子犯授以璧云云公曰所不與舅氏同心者有如白水投璧于河而濟文公既入賞從亡者介之推不言祿祿亦弗及遂隱而死文公求之不得以綿上為之田曰以志吾過且旌善人

綿上田荒草滿畦感時懷古不勝悲及河授璧要君者得賞終慚介子推

沂水

孔子謂弟子各言其志曾點舍瑟而對曰暮春者春服既成冠者五六人童子六七人浴乎沂風乎舞雩詠而歸夫子喟然嘆曰吾與點也

汀蒲獵獵岸花紅一碧涵天玉鏡空春服既成絃誦畢

杖藜來詠舞雩風

虎丘

吳王闔閭葬於姑蘇長洲苑之海涌峯殉以盤郢魚鴈之劍七日金氣上昇化為白虎蹲

於冢上因

曰虎丘

湛盧盤郢豈長存神虎號風夜尚聞一片生公誨臺月

幾番圓缺照孤墳

曲阜

孔子之喪子貢曰吾見封之若堂者矣若坊者矣若覆夏屋者矣若斧者矣從若斧者焉

馬鬣封

之謂也

馬鬣封來今幾年鬱然喬木尚參天斯文不逐秦灰冷

玉振金聲亘古傳

苧蘿山

西施生于會稽之苧蘿山山下溪水濱西施浣紗石存焉。越王勾踐取西施進之

吳王夫差吳王築姑蘇臺館娃宮不恤國政越因破之

溪邊山色倚雲青
石上芙蓉照水明
見說蘇臺有麋鹿
始知哲婦解傾城

琴臺

姑蘇靈岩山下有吳王館娃宮遺址西子琴臺在焉

吳苑春深花亂開
遊人携酒上空臺
金徽玉軫無消息
野鹿山禽自往來

雪宮

孟子見齊王處基
在臨淄牛山之側

戰國興亡感客情
雪宮遺址幾秋螢
賢愚王霸皆塵土
不廢牛山萬古青

中山

樂羊為魏文侯將圍中山
中山人烹其子遺之羹
羊啜之盡諸師贊曰其子食之其誰不
食三年拔中山歸而文侯示之謗
書盈篋然雖賞其功終疑其心

滅親為國義何深
衆口由來解鑠金
盈篋謗書能不惑
賞功何必更疑心

東海

魏遣新垣衍說趙請帝秦魯仲連見衍曰彼
即肆然為帝吾將蹈東海秦軍聞之却五十

里

秋風策策破鴻蒙起看搏桑曉日紅可是魯連東去後
不知嬴政帝關中

菖蒲礪

廣州有菖蒲礪生九節菖蒲安期生嘗採
餌秦始皇見之與語三日夜賜金璧萬數

不受而去留赤
玉鴛一兩為報

欲訪安期問始皇神仙蹤跡竟荒唐淙淙雲礪青山下
依舊菖蒲九節香

懷清臺

巴寡婦據丹穴擅利以財自衛人不敢犯
始皇以為貞婦而客之為築懷清臺。河

間婦始潔終
汚柳子有傳

丹穴年深蔓草生巴人指點說懷清當時解勝河間婦

不負高臺萬古名

望夷宮

趙高擅國政恐人不從獻鹿於二世云馬
二世曰丞相誤矣鹿也非馬也百官何其

旨者以為馬或云鹿者則必陰黜之致天
下大亂漢高祖因之起至灞上而有天下

經典遺灰掃地空山東豪傑起如蜂宮中野鹿原非馬
灞上池魚解化龍

戲馬臺

宋武帝在彭城九日登項羽
戲馬臺謝宣明賦詩云云

二雄事業總消沉
蔓草寒烟感慨深
留得謝公吟詠處
我來携酒一登臨

未央宮

漢高祖此稱帝尊太公為太上皇帝置酒未央前殿奉玉卮為上皇壽羣臣皆呼萬歲。初項羽困高祖於滎陽為高祖置太公於其上告漢王曰今不急下吾烹太公漢王曰吾與若約為兄弟吾翁即若翁若欲烹乃翁幸分我一杯羹

灞上歸來一布衣
手提三尺啓鴻基
奉親前殿開樽日

可話分羹置俎時

宣室

賈誼文帝時為博士時年二十餘上疏陳政事名治安策絳灌之徒毀之曰洛陽年少專

欲擅推帝乃踈之以誼為長沙王太傅上思
賈誼因召之入見上方受釐宣室因感鬼神
之本誼對所以然夜半前席上乃嘆
曰久不見賈生自謂過之今不及也

賈傅才高困舌端君臣際會古來難如何宣室求賢夜
不為蒼生問治安

靈光殿

漢魯恭王餘嘗欲壞孔子宅為宮至漢中
微兵燹之後其所見靈光殿巋然獨存王

延壽作賦意者神明依
憑支持以保漢室者

奢縱當年怪魯恭敢隳宣聖宅為宮後人却笑王延壽
不見靈光劫火紅

會稽

朱買臣家貧採樵自給好讀書負薪行誦于市其妻以為慙而去之後擢為本郡太守武

帝謂之曰富貴不歸

故鄉如衣繡夜行

野老相從說買臣歸來五馬繡衣新負薪行誦慙妻妾
尤勝墻間乞食人

臨邛市

卓王孫女文君新寡司馬相如以綠綺琴心挑之與之私奔居臨邛家徒壁立文君

當壚賣酒相如滌器後楊得意薦之於武帝因奉使至蜀太守郊迎縣令負弩前驅

綠綺無聲冷素絃家徒四壁正蕭然縣公負弩前驅日
忘却當壚滌器年

欽定四庫全書

三華集
卷七

九

狼居胥山

霍去病善騎射為票姚校尉凡六出擊匈奴封狼居胥山禪於姑衍加驃騎將

軍封冠

軍侯

青海黃沙戰血紅
漢廷何苦重邊功
百靈上訴天應泣

未必崇山肯受封

渤海

龔遂字少卿漢宣帝朝為渤海太守單車至府勸民務農桑使賣劍買牛賣刀買犢風化

大行

賣刀買犢事耕耘
千載遺風俗尚淳
安得萬方賢牧守

盡如龔遂化斯民

淮南

漢劉安封淮南王與八公等學仙作大小山招隱篇後丹成飛昇雞犬舐丹鼎亦得上天世云雞鳴天上犬吠雲間

寂寂劉安去不還神仙往事有無間雲中雞犬知何處
獨遣人傳大小山

建章宮

漢武帝栢梁殿災粵巫占之曰粵俗有大災即復起大屋以厭勝之於是作建章宮千門萬戶極土木之華麗金莖承露鳳闕凌雲古今罕比上好神仙喜邊功所以王母將降則青鳥來獻師奏捷則天馬至

栢梁煨燼建章成萬戶千門壓鳳城天馬不來青鳥去

欽定四庫全書

三華集
卷七

十

幾番涼露濕金莖

九折坂

王尊為益州刺史先是王陽守是州至邛邛九折坂嘆曰奉先人遺體奈何乘此險

尊至問吏曰此非王陽所畏道耶叱其馭而過曰王陽為孝子王尊為忠臣

古道巉岽斷客腸蜀山西望鬱蒼蒼至今九折邛邛坂

孝子忠臣說二王

槐市

漢平帝元始間建明堂辟雍種槐數百行朔望諸生持大書土物交易於其下揖讓講論

文物為一時之盛

炎漢中微道未湮彬彬禮樂一時新只今無樹容棲鳥

極目荒基碧草春

東都門

逢萌字慶子王莽專政殺其子宇萌曰三網絕矣不去禍將及身掛冠於東門將家

屬浮海後光武中興連微不起

三綱既絕此何時獨羨逢公早見幾試問掛冠歸去後

與誰同採首陽薇

天祿閣

劉向校書天祿閣夜有黃衣老人自云太乙之精燃青藜杖端照之出懷中竹牒天

文地圖之書自是向學日進成帝時王氏愈盛向著論奏之天子心知向之精忠而不能
用也。揚雄亦校書於天祿閣值王莽投劉
棻於四裔辭連雄治獄使者來雄懼從閣上

投下幾死時為之語曰惟寂惟寞自投于閭
○雄仕莽為大夫故朱文公書曰莽大夫揚
死雄

太乙青藜信有無唯餘陳跡寄榛蕪精忠祇憶劉中壘
寂寞空慙莽大夫

雲臺
漢顯宗圖中興功臣高密侯
鄧禹等三十六人於雲臺

漢家三十六功臣一一丹青寫鳳麟岵壞臺遺幾尺
風雲還為護荆榛

安邑
解州安邑縣南有古蚩尤城○鹽池周回一
百四十餘里朝取夕復終無減損但廣狹淺

深古今不同耳。○太原閔仲叔世稱節士，富安邑家貧嗜猪肝屠者或不肯與安邑令勅其民常給之。仲叔怪問而知之，乃嘆曰：「閔仲叔豈容以口腹累安邑之民！」

雨落鹽池雪滿川，虫尤城下草連天。曾為仲叔猪肝累，

從此居民不愛賢。

壺頭山

馬援慷慨有大志，嘗曰：「男子要當死邊野，以馬革裹屍還葬耳。」何能卧牀上死於兒

女子手中耶？從弟少游憐之，因曰：「士生一世，但取衣食裁足，乘下澤車，御款段馬，鄉里稱善人足矣。何必自苦耶？」援征交趾，在浪泊西里間，上霧下潦，仰視飛鷲跼跼墮水中，念少游平生時語，何可得也。進營壺頭，病卒。

長星夜落瘴烟間壯志何由靖百蠻空念平生少游語
終教馬革裹屍還

疏勒城

耿恭有將帥才永平中為戊巳校尉攻匈奴引兵據疏勒城匈奴擁絕澗水士卒渴

甚恭於城中穿井十五丈不得水乃整衣冠向井再拜有頃水泉奔出揚水示虜虜以為神明遂去。鄭衆上疏曰耿恭以單兵守孤城鑿山為井煮弩為糧卒全忠勇古未有也

灑面寒沙風力強蕭條古壘客愁長鑿山煮弩無蹤跡
留得清泉一脉香

葱嶺

西域胡僧摩騰竺法蘭漢明帝時白馬馱經踰葱嶺西來佛法始入中國用夷變夏聖道

日湮
矣

吾道中微冷似灰教傳西域異端開此山恨不高千億
免使馱經白馬來

合浦

孟嘗字伯周為合浦太守郡不產穀惟水產珠號其地為珠池前守貪穢所採不知紀極珠徙交趾嘗革前弊去珠復還百姓蒙利稱為神明

精誠感物物何知一德能回造化私人去似聞珠亦去
月明長為照空池

萊蕪

范丹字史雲達時絕俗漢桓帝朝為萊蕪長有時絕粒間里歌曰甌中生塵范史雲釜中

生魚范萊蕪卒
謚貞節先生

一貧誰謂史雲愚釜甌生塵道轉腴獨行高名千載後
清風猶得勵貪夫

鴻山

梁鴻字伯鸞過京師作五噫歌適吳至無錫
依大家車伯通卒伯通為求葬地於吳要離
冢傍咸曰要離烈士而
伯鸞清高可令相近

翠巘巍巍一逕深五噫歌罷有遺音荒墳沉近要離塚
二子清風共古今

鄭公鄉

鄭玄字康成北海人也教授於家所居山下
生草如薤因名鄭康成書帶草孔融名

其所居為鄭公
鄉門曰通德門

傳家詩禮姓名香比屋絃歌春晝長幽逕不生書帶草
何人知是鄭公鄉

鄮塢

董卓擅權聚金帛於鄮塢億萬計自云後雖
去位亦不失作富家翁泊王允與呂布謀誅
之有人書呂字於布荷而行於市歌曰布乎
布乎有告卓者卓弗悟竟被誅陳屍於市守
者以大炷置卓臍中然
之光明達旦者累日

積金盈塢計何踈豈信車中有布乎笑殺夜深臍上火
遺光能照後人無

欽定四庫全書

三華集
卷七

十四

鹿門

龐德公躬耕龐畝劉表欲辟之不就因問曰先生不受官祿何以遺子孫耶公曰世人遺之以危我遺之以安雖所遺不同而未為無所遺也漢建安中攜妻子入鹿門山採藥不返

鹿門山色碧雲端劉表何由得鳳鸞名利總如蛾赴焰

先生獨遺子孫安

呼鷹臺

劉表好鷹築臺於沔水之南常登臺呼鷹歌野鷹來曲

不見英雄劉景升高臺寂寞與誰登潮生潮落空江上

幾度秋風來野鷹

八陣圖

永嘉薛氏曰諸葛孔明八陣圖可見者三
在沔陽高平者闕難識在廣都八陣鄉

者隆土為基魁以江石四門門首六十四魁
八八成行兩陣俱立在魚復者因江為勢積
石憑流前蔽壁門後依却月縱橫皆八魁間
二丈七八為經六九為緯濤浪雷衝千古不
轉者也

浪激沙傾石不移神明終古為扶持長星不向前營墜


混一中原事可知

曹娥江

曹娥上虞人父盱為巫祝溺死娥年十四
號哭旬有七日投江而死抱父屍而出即

郭淳作碑蔡邕題其後曰黃絹幼婦外孫
蘧曰○楊脩見之曰此乃絕妙好辭也

腸斷春江欲暮時
青山如髻柳如眉
寂寥往事無人問
絕妙空傳八字碑



三華集卷七

欽定四庫全書

集部

三華集卷八至十

詳校官中書臣覆照

助教臣常循覆勘

總校官進士臣朱鈐

校對官修撰臣吳錫齡

謄錄監生臣劉廷勲

欽定四庫全書

三華集卷八

明 錢子義 撰

種菊菴集二

續詠史詩中

爛柯山

王質八石室山伐木見二童子奕碁旁觀之比局終則坐下斧柯爛矣

如碁世事不堪論
何事貪看局局新
爛却斧柯渾未悟
歸來滄海欲揚塵

許昌

許州城西門內即荀淑故居高陽里淑有子八人並有名稱號為八龍。魏文帝受漢禪

于繁昌城

即此地也

回首繁昌往事空蕭蕭斜日下崇墉羸驂又過高陽里
還向居民問八龍

富平津

當陽杜預字元凱以孟津渡險建河橋於富平津橋成蜿蜒起伏儼若蒼龍晉武帝

舉酒屬預曰非君此橋不成預遜謝帝善之

杜侯曾此建輿梁華表依然掛夕陽風雨夜來江漢立
蒼龍幾趁白雲驤

義興

晉平西將軍周處字子隱居義興南山有白額虎長橋下有蛟甚為民害公入山射虎沒

水斬蛟民害乃息元末兵燹存臻廬舍靡有子遺惟孝侯之祠如故王右軍所書碑亦存

茶焙初香谷雨前青山如黛水如天斬蛟祠在長橋下

遠客打碑來繫船

豐城

晉武帝時斗牛間常有紫氣張華問雷煥曰此何祥也煥曰寶劍之精上徹于天在豫章

豐城縣華補煥豐城令掘地得二劍送龍泉與華太阿白佩後晉惠帝末天下大亂張雷

繼歿劍
化去

晉室蕭牆起鬪爭匣中龍劍氣崢嶸當時竟為張雷誤

不得韜光到太平

巴園

巴園霜後收二橘大如三斗盎剖之各有二
更相對象戲云云又曰橘中之樂不減商山
惜為庸人所摘不
得深根固蒂耳

歲晚商顏草木枯
逶迤能似蜀山無
橘中早解容真隱
可受留侯折簡呼

梓澤

石崇作金谷園於梓澤窮極奢侈塗椒為壁
雙蠟為薪與王愷闕富愷作紫絲布步障四十
里崇作錦步障五十里愷出珊瑚樹高二尺
許崇以鐵如意擊碎之以高三四尺者償之
枝幹扶踈光影奪目愷為之惘然崇有妾綠
珠絕色也孫秀求之不得嗾趙王倫收之綠

珠墜樓死趙王
遂殺崇於東市

三尺珊瑚映碧綃
椒爨蠟鬪奢豪可憐
金谷樓前路
不見春紅見野蒿

習家池

山簡字季倫晉永嘉初出為征南將軍鎮襄陽常至習家池上置酒輒醉歸時有兒

童作白銅鞮歌曰山公出何許往至高陽池
日夕倒載歸酩酊無所知時時能騎馬倒著
白接羅舉鞭向葛疆何如并州兒

峴首山頭日欲西山公倒著接羅歸
銅鞮聲斷風流盡
還有斜陽照客衣

河陽

潘岳字安仁才名冠世為衆所嫉棲遲十年出為河陽令滿縣植桃李花人號為河陽一

縣花後與石崇等詒事賈

謚每候其出望塵而拜

潘岳才華屈未伸簪纓甘污賈生塵滿城桃李雖如錦
不及甘棠一樹春

吳淞江

張翰字季鷹晉惠帝朝為齊王東曹掾因秋風起思吳中蓴菜鱸魚之美嘆曰人生

貴在適意爾富貴何為即引去

霜楓葉落四腮肥歲晚江空客未歸欲買扁舟赴張翰
一簑烟雨看鷗飛

垂虹橋

吳江長橋跨江之南北截然中流宛若長虹寶東南之北觀上有三高祠范蠡張翰

陸龜

蒙也

華表凌雲白鶴雙玉龍千尺卧清江三高祠下秋風急
浪激飛花洒石幢

鐵柱觀

南昌鐵柱觀昔有蛟為害旌陽令許遜字敬之立鐵柱鎖之蛟害遂息

江心一柱鎮南昌波底潛蛟卧欲僵仙客不來春寂寞
步虛壇上碧桃香

司州

劉琨字越石與祖逖俱為司州主簿同寢中夜聞雞鳴皆起舞後聞逖被用與親故書曰

吾枕戈待旦志梟逆虜
常恐祖生先我著鞭

山川寥落暗風塵無復聞雞起舞人有客枕戈空待旦
數奇無處問通津

抱犢山

王烈字長休入河東抱犢山石室中見素
書一卷不識其字不敢取歸言於嵇康寫
示所記字康能識因共往取之則失其所
在烈私語其弟子曰嵇叔夜不應得道故

陰陰石洞鎖清虛仙篆何人為卷舒若使嵇生有仙骨
免教重著絕交書

蘇門山

孫登字公和好撫一絃琴阮籍常遇於蘇
門山與商畧終古及棲神養氣之術登不

荅籍因長嘯而去退至半嶺
聞九霄鸞鳳之聲乃登嘯也

養氣棲神未易明一絃聊以寄閒情
鳳鸞聲在青雲外
回首空慙阮步兵

餘不亭

孔愉字敬康以功封餘不亭侯未達時常
經行此亭見籠龜於路買而放之其龜中
流左顧者三及鑄侯印龜左
顧三鑄如初愉悟而佩之

杜若吹香楊柳青蕩舟衝雨下雲汀放龜人去存遺跡
白石仍為左顧形

新亭

晉過江朝士宴於新亭周顗嘆曰風景不殊
舉目有山河之異相視流涕王導曰當共慘

力王室克復神州何
至作楚囚對泣耶

白下門前草木秋客懷惻惻落不禁愁余生亦有英雄淚
恥向新亭泣楚囚

山陰

王右軍為會稽內史上已日與謝安等修禊
於山陰之蘭亭流觴賦詩右軍作序醉中以
繭紙書之筆法妙絕醒後自謂有神助後雖
寫數十百紙皆莫及醉中所書者後世傳以
為寶唐太宗得之貯以玉匣殉葬昭陵
及唐亡溫韜發昭陵出之紙墨如新

蘭亭客散羽觴閒依舊寒流遶碧山繭紙有神終不泯
昭陵玉匣出人間

剡溪

王子猷雪夜忽憶戴安道即乘舟訪之于剡溪經宿方至既造門便返曰乘興而來興盡

乃返何必見

戴安道耶

溪水流漸雪未融夜深殘月上孤蓬不因興盡歸來速
要看冰壺表裏空

鍾山

周顒字彥倫鍾山隱居後仕宋為國子博士復欲歸隱孔稚珪作北山移文譏之有云蕙

帳空兮夜鶴怨山人去兮曉猿驚

蟠龍踞虎擁金陵五色雲中出翠屏莫遣故山猿鶴怨

一樽來慰草堂靈

龍山

孟嘉字萬年江夏人晉永和中為桓溫參軍九日溫宴客龍山風吹嘉帽落初不自覺其

風流俊雅

為時稱羨

吟鞭曾過楚江濱回首崇山起暮雲欲買黃花作重九

風流難覓孟參軍

南樓

庾亮字元規晉咸和中自中書令出鎮武昌諸佐史殷浩輩乘月夜登南樓亮忽至曰老

子於此興復不淺據胡牀談詠竟夕。亮雖居外鎮而執朝廷之權王導甚為不平每西

風起即舉扇自蔽

曰庾元規塵污人

客去南樓春復春武昌月色幾番新元規風致清如許

何事飛塵解污人

雷澤

陶侃字士行少時漁于雷澤網得一織梭掛於壁有頃雷雨化為龍去侃嘗夢生八翼飛

上天見天門九重入其八惟一門不得入後都督八州諸軍事

昨夜神梭已化龍風雷繞澤水淙淙八州都督功成速不到天門第九重

貪泉

廣州有貪泉世云飲之者則起貪欲之心吳隱之字處默為廣州守取而酌之賦詩曰古人云此水一飲懷千金試使夷齊飲終當不易心在官清操愈厲

千金一飲豈其然獨酌無傷處默賢聞道黃金入鄙塢

未應在處有貪泉

謂賢愚貪廉在乎人之資稟未必因飲一水而變其所守假如董卓之貪

愚亦何嘗飲此水也

統萬城

赫連勃勃建國號曰夏蒸土築城堅可礪乃名之曰統萬子孫相傳止二十五年而

後魏滅之

蒸土為垣鐵石堅轉頭荒草已芊芊當時謾作千年計
空使今人笑赫連

虎溪

遠法師居廬阜送客不過虎溪過輒鳴號一日送陶淵明陸脩靜與談道合不覺過之因

相與大笑好事者寫之名為虎溪三笑圖以傳於世

溪遶匡廬山盡頭三賢何在水空流
惟餘脩竹吟風葉
彷彿當年笑未休

永嘉

謝靈運宋元嘉中為永嘉守郡有名山水肆意遨遊常躡木屐上山去前齒下山去後齒與族弟惠連友愛至深每對之輒得佳句嘗於西堂詩不就忽夢惠連而得池塘生春草之句常云此句若有神助

白鶴峯高翠接旻登山人去屐生塵
可憐一覺西堂夢
依舊池塘碧草春

句曲山

陶弘景居句曲山華陽第八洞天梁武帝曾以書問云山中何所有陶足為五言詩

答之云嶺上多白雲只
可自怡悅不堪持寄君

青松白石養高閒長在華陽第幾山嶺上野雲那可辱
豈容持寄到人間

壽春

梁武帝嘗欲築堰以灌壽春水中有蛟龍窟
土木俱不得止因斂錢十萬斤為之始成後
堰崩聲聞四十里
士卒死者數萬人

硤石嵯峨錦樹秋興亡得失兩悠悠浮山堰下蛟龍宅
冷雨腥風動客愁

仁壽宮

隋文帝欲避暑於仁壽宮術士仇大翼諫
曰是行恐鑿與不返上怒不聽後果遇弒

崩於大

寶殿

峨峨樓閣五雲間
一去龍輿竟不還
興廢總如春夢裏
落花啼鳥滿空山

江都

隋煬帝窮兵黷武以征遼東造龍舟有翔螭朱鳥等名幸江都賦詩留別宮嬪有云我夢

江都好征遼亦偶然

煬帝龍舟下洛川
翔螭朱鳥錦聯翩
夢中亦愛江都好
未必征遼是偶然

河汾

王通謚文中子常西遊長安見隋文帝於太極殿奏太平十二策文帝不能用而講學河

汾房杜王魏咸北面受王佐之道後
皆能相太宗平定天下為唐宗臣

太平高策匪空言何事隋文不愛賢房杜竟傳王佐術
手扶紅日上虞淵

玄武門

唐秦王世民與太子建成構隙欲舉兵卜
之宮僚張公瑾從外來投龜於地云卜以

決疑不疑何卜卜之不吉庸得
已乎因誅建成於玄武門

尺可縫兮斗可春如何同氣不相容當時公瑾來如晚
未必龜從筮亦從

漢文帝誅淮南王民謠曰一斗粟尚
可春一尺布尚可縫兄弟二人不相

容

新豐市

馬周舍新豐逆旅命酒一斗八升悠然獨酌後以常何薦際遇太宗拜中書令帝嘗

以飛白書賜之云鸞鳳冲霄必假羽翼云云

逆旅新豐舊酒香悠然獨酌醉何傷
風雲際會應非晚鸞鳳冲霄羽翼長

箕山

田游岩隱箕山許由祠旁唐高宗幸嵩山親至其家田野服出拜曰臣所謂泉石膏肓烟霞痼疾者也召至京師帝自書榜其門曰隱士田游岩宅

晚歲箕山豺虎多許由祠下鎖松蘿
田家舊宅無人住

泉石煙霞奈爾何

滕王閣

在南昌江上滕王元嬰所建。王勃舟次馬當山下遇中元帝君語之曰明日閣都

督大會客於滕王閣當助清風一帆次日勃至作詩序

獨倚危闌易感傷落霞孤鶩楚天長江風又送征帆去

何處青山是馬當

終南山

盧藏用始隱終南山有意用世人目曰隨駕隱士。司馬承禎將還山藏用指終南

曰此中大有嘉處承禎曰以僕視之仕宦之捷徑耳盧用慙

脩竹長松遶磴阿幾家燈火隔烟蘿此中佳趣人應羨

為有青雲捷徑多

大非川

唐咸亨中薛仁貴與吐蕃戰于大非川郭待封與薛仁貴有隙故違薛仁貴號令以

致薛大敗

白骨黃沙照夕峯斷腸無處問遺蹤悲笳咽咽秋風裏
似怨當年郭待封

九龍峯

陸羽字鴻漸以無錫九龍山泉為天下第一
二游瀾堂龍井趙宋取以供御人不敢汲

飲。山間有桑苧翁祠茶竈遺跡

青山飛下白雲端御井沉沉鎖翠寒陸羽祠前舊茶竈
道人留試小龍團

黃麋谷

唐則天時唐兵與契丹戰于黃麋谷敗績大將張玄遇王仁節皆被擒初里謠有云

黃獐黃獐草裏藏彎弓射爾傷蓋詩妖也後乃驗

朔漠風高燕草黃胡塵獵獵走黃麋征人谷口頻回首

猶恐彎弓射爾傷

華清池

華清宮溫泉明皇作玉甃蓮花湯與楊貴妃所浴別有長湯十六所甃以文瑤寶石

以賜嬪御所浴

一派溫泉瀉碧山玉環脂粉落人間我來濯足猶嫌澣

不信山靈不厚顏

華萼樓

玄宗造華萼樓曰與諸王宴集畫六馬滾塵圖上最愛玉面花驄後將亂俄失其所

在

誰似開元友愛隆簫韶日日五雲中霓裳舞徹胡塵起
畫壁誰看玉面驄

曲江

張九齡唐賢相也世稱為曲江公而不忍名之嘗進千秋金鑑錄帝嘉賞之後為李林甫姦譏去位天下惜之

盛唐賢相曲江公
萼斐終隳補袞功
留得千秋金鑑錄
不須汗竹載孤忠

輞川

王維字摩詰微時為岐王作琵琶曲名鬱輪袍貴戚大愛之遂黃綠顯達別墅在輞川有

花竹山川之勝遊賞吟詠於其中寫輞川圖傳於世

興亡談笑付漁樵別墅淒涼半野蒿昨夜琵琶新月下

舊聲誰寫鬱輪袍

鳳凰臺

在金陵城中李太白嘗題詩曰鳳凰臺上鳳凰遊鳳去臺空江自流云云為古今絕

唱

蕭蕭蔓草鎖空臺鳳鳥千年去不來李白題詩舊遊處

斷雲斜日謾徘徊

偃月臺

唐玄宗用姦臣李林甫作相家有偃月臺每欲排斥大臣則居此中思中傷之若喜

而出即其家破矣

華堂想像勢凌雲曾養封狐逐鳳麟遺址年深無瓦礫

行人側目唾荆榛

浣花溪

杜甫字子美居成都節度使裴冕為卜居西郭浣花溪上作草堂日吟詠於其中

錦水東來雪乍融落花如雨漲春紅杜陵野老吟詩處

檀樹蕭蕭動晚風

鑑湖

賀知章字季真號四明狂客開元中為秘監後乞歸田里詔賜鏡湖剡川一曲

越山稠疊碧崔嵬曲曲晴波玉鏡開落盡藕花三百里
月隨狂客酒船回

漁陽

唐天寶中宮中牡丹盛開為鹿銜去人皆知為不祥時安祿山為漁陽節度使張九齡嘗言其有反相勸誅之帝不聽後起兵反攻破潼關玄宗幸蜀

天寶漁陽養禍胎咸陽宮殿起塵埃君王若聽忠臣諫
不放銜花野鹿來

夜郎

李白字太白天寶初至長安賀知章見其文曰子謫仙人也言於上召見金鑾殿供奉翰林後有罪長流夜郎遇赦還采石舟中醉攄月影自沉於水

瘴雨蠻烟萬里邊
遊仙夢入夜郎天
歸來久厭人間世
采石江頭月滿川

三華集卷八

欽定四庫全書

三華集卷九

明 錢子義 撰

種菊菴集三

續詠史詩下

睢陽

許遠守睢陽祿山反其將尹子奇來攻賊勢熾甚張巡奮忠義代許守之大小四百餘戰糧盡援絕城陷罵賊而死許遠亦死之

河水東來勢淼漫斷雲斜日朔風寒孤忠烈烈存遺廟

長使英雄洒淚看

馬嵬

天寶遺事云玄宗避寇幸蜀至馬嵬六軍不發歸罪於楊貴妃命高力士以白練絞死於是六軍忽其亂宮致禍萬馬踐之。此雖與史有異同姑從其說以為傾城之戒

翠華西拂隴雲長玉碎花飛斷客腸聞道馬嵬坡上下

風來猶帶荔枝香

凝碧池

祿山陷京師王維為其所得陪宴凝碧池詩云萬戶傷心生野烟百官何日更朝天

秋槐葉落深宮裏
凝碧池頭奏管絃

玉輦蒙塵度錦川咸陽宮殿犬羊羶當時却笑王摩詰

也向池邊聽管絃

采石

李白嘗乘月與崔宗之自采石至金陵著錦袍坐舟中旁若無人後因不得志夜泊采石舟中見月映水大醉投波捫月而死

李白騎鯨去不還潮聲嗚咽遶青山傷心昨夜遙天月

冷浸澄波玉一灣

雲安

杜甫嘗有詠杜鵑詩云西川有杜鵑東川無杜鵑涪萬無杜鵑而安有杜鵑云云蓋有託興云爾後人因造杜鵑堂於雲安縣今尚存

山色波光遶縣青瞿塘漲雪勢峻嶒杜鵑堂下來何晚

空憶能詩杜少陵

陳陶斜

唐房琯詔收復西京效古法用車與賊戰於陳陶斜官軍大敗義兵死者四萬餘人

燐火風沙滿故墟房公曾此用兵車握奇貴在知通變

趙括當年只讀書

西塞山

山在湖州張志和居江湖號烟波釣徒每垂釣不投餌志不在魚也有漁歌曰西塞

山前白鷺飛桃花流水鱖魚肥云云青箬笠綠蓑衣斜風細雨不須歸云云

灩灩桃花漲碧灘雨晴春暖綠蓑閒來遲不識玄真子

獨棹扁舟載酒還

浯溪

唐室再造元結字次山作大唐中興頌磨厓石而書鐫之於永州浯溪

青史遺文感慨多古碑空寄碧嵯峨中興解復宣光業

是處崇山石可磨

道州

古舂陵也風俗島夷卉服州產侏儒唐時歲貢矮奴陽城為守表云有矮民無矮奴朝廷不能奪始不復貢民立生祠以祀之柳子厚作遺愛碑

卉服居民雜島夷矮奴來貢事堪悲陽公遺愛無人問

獨向荒祠看斷碑

奉天城

唐德宗用盧杞為相致天下再亂。衛士桑道茂請修奉天城朝廷以其常言多驗

用其言增築之後朱泚之叛帝幸奉天賴城垣堅固得濟其難

唐世中哀事可嗟不知盧杞是姦邪自非術士能先覺
咫尺驚塵犯翠華

鶴林寺

在潤州有杜鵑花一株高丈餘殷七七以道術稱周寶為守因謂殷曰重九將近能

開此花否殷許之及九日爛漫如春

大雄宮殿倚長江金碧翬飛耀日光安得道人殷七七
杜鵑花下賞重陽

潯陽江

白居易字樂天謫居潯陽月夜送客至江許遇商婦避登舟與彈琵琶樂天為作琵琶行後人造琵琶亭于上

艤棹空江萬感生
荻花楓葉起秋聲
琵琶亭上娟娟月
曾照孤舟此夜明

籌邊樓

李德裕節度西川建籌邊樓泊入相以功進太尉封趙國公後貶崖州歿於貶所

碧瓦朱甍拂翠烟
瓊筵玉座坐籌邊
功成萬里珠崖路
回首斯樓一悵然

平泉莊

李德裕置此莊周圍十里臺榭百餘奇花異卉
跡松怪石靡不畢致嘗作詩示其諸子姪云後

以一木一石與人者非佳子
弟也寶歷中嘗進丹宸六歲

浮雲萬變不堪論
謾把平泉囑後昆
木石等閒零落盡

唯遺丹宸六箴存

香山

白樂天晚年居東都結香山社自稱香山居士鑿龍門八節灘為勝遊之樂時有二妾名小蠻樊素

道人相約禮維摩八節灘頭逸興多香火一龕甘寂寞

風流無奈素蠻何

綠野堂

晉公裴度治第東都集賢里作綠野堂日與白居易劉禹錫輩把酒賦詩晝夜相歡

丹心炯炯照重玄身繫安危二十年因過午橋莊畔路

居民指點說忠賢

蔡州

吳元濟據蔡州叛李愬大雪夜進兵夜半至懸瓠城旁驚鷺池愬令擊之以亂軍聲黎明

雪止入駐城中
擒吳元濟以獻

雪壓重城夜始分
門前羅虎似雲屯
至今鶩鶩池邊路
蛙黽無聲殺氣昏

盤谷

韓愈字退之有送李愿歸盤谷序世有云
唐無文章惟韓昌黎盤谷序一篇而已

林泉寂歷鎖烟霏
遯世誰同李愿歸
多賴韓公留傑作
青山從此有光輝

柳州

柳子厚貶柳州刺史卒於彼柳人敬
而懷之為立廟於羅池韓愈與作碑

萬里龍城客路長
檳榔初熟桂花香
蠻烟瘴雨羅池廟

簫鼓聲中幾夕陽

藍關

韓昌黎姪之子湘落鬼不羈文公勉之學湘
曰吾之學非公所知公使言其意作詩曰青
山雲水窟此地是吾家又云解造逡巡酒能
開頃刻花公曰子能奪造化耶湘曰甚易即
聚土覆盆良久開碧色牡丹一枝花瓣上出
金字一聯云雲橫秦嶺家何在雪擁藍關馬
不前公不悟後因諫迎佛骨迕上意貶潮州
刺史中途遇大雪馬不能前問其地即藍關
也

瘴烟深處是潮陽風雪藍關客路長若悟韓湘花上語
投簪同老白雲鄉

玄都觀

劉禹錫嘗有玄都觀看花詩云玄都觀裏桃千樹盡是劉郎去後栽後十餘年再過

玄都觀桃花無復一存惟兔葵燕麥動搖春風耳復有詩云云以詆權近聞者益薄其行

昨日芳桃炫晚霞今朝茂草競春華人情世態渾如此

不獨玄都觀裏花

雪川

杜牧過湖州太守為張水嬉民庶聚觀一姥引一女絕色也杜因以羅縵一篋為質後十

四年杜來守湖州女已適人生一子矣杜因賦曰自是尋芳去較遲不須惆悵怨芳時狂

風落盡深紅色綠葉成陰子滿枝

溪上桃花漲小紅畫船曾入水晶宮風流太守來何暮

綠葉成陰往事空

邯鄲

呂洞賓過邯鄲邸前有盧生者下第回買飯於邸主人方蒸黃粱盧生具道平生困厄呂因取囊枕受之曰枕此當榮適如願生就枕恍惚身入枕穴中未幾登第娶宰相女富貴出入將相榮盛無比逾五十年忽欠伸而寤呂翁在旁主人所蒸黃粱尚未熟因此盧生寤大

身世悠悠枕穴中風花泡影轉頭空主人為報黃粱熟

一笑青山落照紅

黃鶴樓

鄂州圖經云唐費文偉仙去駕黃鶴返憩于此因建是樓。李白有詩云黃鶴樓中

吹玉笛江城五月落梅花。崔灝有詩云昔人已乘白雲去此地空餘黃鶴樓云云世稱為之閣筆

絕唱李謫仙

綉窓珠戶倚雲開樓上仙翁去不來昨夜何人吹玉笛

一天明月鶴飛回

少室山

李渤隱此山元和初召拜右拾遺不就韓文公與之書有云朝廷士引領東望若景

星鳳凰爭先覩之為快又贈詩云少室山人索價高兩以諫官徵不起

遠屋青山蔭白茅諫坡未必似蘭皋景星祥鳳何由覩

莫恠山人索價高

甫里

陸龜蒙居松江甫里扁舟備筆牀茶竈釣具
琴書往來江湖號為江湖散人嘗作江湖散
人歌其結句云官家未議
活蒼生拜賜江湖散人號

水煖魚肥震澤春
筆牀茶竈往來頻
先生不為蒼生起
只向江湖作散人

王官谷

司空圖字表聖唐咸通中擢進士景福中
拜諫議大夫不赴居中條山王官谷作休
休亭時盜賊蠭起所過
殘毀獨不入王官谷

休休亭下四時春
甘向深山作隱淪
盜賊欲侵應不恐
小人未必盡無仁

衣錦山

武肅王微時居杭州臨安後為鎮海節度使天下兵馬都元帥吳越國王所居山林

皆衣之以錦繡名之曰衣錦山
唐莊宗賜玉冊金印虎符龍節

虎符龍節氣如虹江水林巒錦繡中往事轉頭成浩歎

野花空映夕陽紅

陳橋

趙宋太祖值周恭帝幼冲時領兵至陳橋兵變軍士以黃袍加太祖身咸呼萬歲擁之入城受周禪今其地有水名躍龍津未必不因此而得名也

分兵授鉞壯圖伸酒醒黃袍已在身偶向居民訪遺跡

風雲曾護躍龍津

三槐堂

王祐字景升趙宋太祖時使魏州還廷上意得貶手植三槐于庭曰吾子孫必有為

三公者天下謂之三槐王氏其子文正公旦拜相後裔榮盛世無與儔

落落高堂雨露深三槐鼎列翠蕭森只今惟有孫枝在散作人間萬畝陰

孤山

林逋字君復住杭州西湖上孤山宋真宗朝賜號和靖先生蓄古琴一張馴鶴一雙喜吟詩愛梅花有詩傳誦於世隱居足不履城市

欲訪人間處士星遠尋遺跡過西泠琴亡鶴化梅花老

名與孤山一樣青

雷陽

寇準字平仲封萊國公蓋忠愍真宗朝拜相
澶淵之役勸上親征決策成功姦臣譖之曰

以上為孤注及貶雷州道出公安剪竹挿祠
前曰準若無負朝廷枯竹再生已而果活生

笋成林人呼
為相公竹

澶淵孤注譖何深萬里南來瘴海濶誰謂寸心天不識

公安枯竹解成林

北苑

建州北苑先春龍焙茶為天下最始於丁晉
公成於蔡君謨有大小龍團方靈芽數拆之

初嘗先民焙十餘日進發飛騎疾馳不出中
春頭網已至于京師矣龍團八餅重一斤故
東坡先生詩曰侍
賜頭網八餅茶

北苑先春雨露香
龍團八餅進頭綱
前丁後蔡俱陳跡
昨夜雷驚雀舌長

相州

魏國忠獻公韓琦字稚圭相人也年二十登進士第唱名第一甲終太史奏曰下五色雲見嘉祐中拜平章事名重一時朝廷倚以為重及判相州作畫錦堂歐陽文忠公為記中有云措天下於泰山之安可謂社稷之臣矣其豐功盛烈所以銘彝鼎而被絃歌者乃邦家之光非閭里之榮也

鄉老爭誇畫錦堂
聲名勲業仰遺芳
公歸豈特榮閭里
貴德尊賢國有光

濂溪

春陵周頤字茂叔居濂溪號濂溪先生窓前有草不除云與自家意思一般作太極圖及

通書數十篇上接洙泗千載之統下啓河洛百世之傳朱晦菴贊曰書不盡言圖不盡意

風月無邊

庭草交翠

千年河洛啓真傳咫尺圖開太極天草色滿簾春寂寂

一庭風月自無邊

東林

湖州沈思字持正隱君子也居東林因號東老能醞十八仙白酒熙寧中呂仙至其家題

詩云西隣已富憂不足東老雖貧樂有餘白酒釀來延好客黃金散盡為收書

茗雪溪頭麴米春綠瓷新釀白於雲明朝欲買扁舟去

來訪東隣沈隱君

天津橋

洛陽天津橋隋煬帝所造卽康節先生於此聞杜鵑聲云不及十年有南人以文字

亂天下者乎至熙寧間王安石新拜參政衆喜得人獨呂獻可舉手謂溫公曰袖中彈文乃新參也光愕然後安石拜相行青苗市易保馬等新法天下騷然司馬溫公曰獻可之先見予所不及也

治亂由來豈偶然洛陽橋北有啼鵲青苗保馬成何事
袖裏彈文獻可賢

獨樂園

司馬溫公居洛中造獨樂園蘇子瞻詩云青山在屋上流水在屋下有五畝園花

竹秀而野花香襲杖
屨竹色侵盛筵云云

紛紛冠蓋洛陽塵誰是悠然獨樂人
流水青山花繞屋

箇中天地四時春

平山堂

廣陵平山堂乃歐陽文忠公所作公嘗題詩于壁東坡先生詞云三過平山堂下平

生彈指聲中十年不見老仙翁壁上龍蛇飛動欲吊文章太守仍歌楊柳春風休言萬事轉頭空未轉頭時皆夢

山色波光杳藹中
畫闌高下濕青紅
日長睡起香爐冷

掃壁看詩憶醉翁

醉翁亭

亭在滁州琅琊山歐陽文忠公作守時僧智仙造公為作記。六一泉在焉

六一泉頭風日清杖藜携酒上空亭汨羅水碧琅琊秀

今古高名異醉醒

赤壁

東坡在黃州嘗月夜與客泛舟遊赤壁之下曾作前後赤壁賦

驚濤東瀨急於弦絕壁橫江翠插天玄鶴不來山月小

勝遊誰繼玉堂仙

芙蓉城

王子高與仙人周瑤英同遊芙蓉城。又石曼卿名延年死後人見其乘青驪行甚

速問之曰我今為仙所主芙蓉城也

弱水蓬萊西復西，玉樓金屋鎖烟霏。
曼卿去後誰為主，花底青驪早晚歸。

朱陳村

白樂天有詩曰：徐州古豐縣有村曰朱陳，一村惟兩姓世世為婚姻云云。東坡詩

曰：我亦朱陳舊使君，勸農曾入杏花村。如今風俗那堪說，縣吏催租夜打門。

陰陰桑梓掩柴扉，稅足年豐吏到稀。
曾見文章賢太守，杏花深處勸農歸。

甓社湖

孫莘老讀書於高郵甓社湖上，夜見大珠明照林木，皆有影，後登第讀書堂在焉。

秋滿高沙甓社湖，月明如水浸平蕪。
讀書堂下人何處？

昨夜分明蚌吐珠

朱仙鎮

完顏氏據中原徽欽二宮北狩岳飛字鵬舉相人也奮其忠勇誓復汴京兵至朱仙

鎮金人破膽已有捐燕以南之議奈何賊臣主和議懼其成功遂詔班師一日奉金字牌

十二飛東向再拜曰臣十年之功廢於一旦非臣不稱職奸臣秦檜實誤陛下也故吳興

趙子昂題岳王墳詩云岳王墳上草離離秋日荒涼石獸危南渡君臣輕社稷中原父老

望旌旗英雄已死嗟何及天下中分遂不支莫向西湖歌此曲水光山色不勝悲。潘子

素詩云萬竈貔貅江上老兩宮環珮夢中歸云云

金牌十二詔班師九仞功成一簣虧德壽殿深春日煖

不知沙漠兩宮悲

棲霞嶺

秦檜主和議殺岳飛二宮無復南還遷於五國城而崩岳侯葬於杭州西湖之棲霞

嶺贈鄂王諡武穆遺廟存焉

薜荔陰陰鎖羨門
我來揮涕吊英魂
青山北望空腸斷
五國城頭落日昏

建陽

朱文公晚年築室建陽號雲谷老人其草堂曰晦菴自號晦翁以一心窮造化之淵盡情性之妙達聖賢之蘊以一身體天地之運備事物之理任綱常之責

晦翁非晦妙中玄
方寸能窮造化淵
山下草堂遺址在

寥寥道學竟誰傳

石湖

在蘇州盤門西南十里太湖之派范成大字至能居之隨高下為亭榭植花竹蓮芰以為湖山絕勝之地繪圖以傳

石湖春水綠於苔時有詩人載酒來欲訪范公遺跡去

淡烟疎雨暗蘇臺

葛嶺

趙宋末巨奸賈似道執國柄遂至於亡國時居西湖之葛嶺遺址尚存焉

聞道湖邊賈氏墟後人憎怨及餘胥不生桃李生荊棘

似與權臣戒覆車

周公曰愛人者及其屋上之烏憎其人者憎其餘胥

厓山

趙宋國亡幼主被虜廣王昺稱帝於廣改元祥興厓山之敗舟沉于海宋祚遂絕

蕭蕭西日慘無暉
寂歷空山海四圍
莫向洪波怨亡國
也勝行酒著青衣

三華集卷九

欽定四庫全書

三華集卷十

明 錢子義 撰

種菊菴集四

雜詠

鄭知縣禱雨歌

鄭侯待下如嚴君不獨南陽推信臣
袁公廟貌遺千春昔為邑宰今為神
二公德若行天雲幽明福被吾鄉民

鴈鴒鰒鰒懸秋旻稻田龜坼焦欲焚嗷嗷鵲飛成羣
螟蜥欲蝥誰能嗔疲農走泣如窮鱗天乎德澤何由均
大哉乾元至哉坤鄭侯悃禱神為伸愛民憂國天所欣
玄冥屏翳不憚勤油然已覆銅官墳甘霖洗出青嶙峋
戴星而出歸夕曛誰能作頌儲與陳穆如清風播司勲

秋夜

玉漏遲遲夜初永銀蟾翠濕梧桐影愁多無夢逐行雲
沉烟銷盡衣篝冷猶憶燈前話別時鳳簫吹斷玉參差

只恐鴛鴦易頭白消磨歲月成嗟咨

送蔣肯堂入試禮闈

雲陽山亭之子孫雍容語晚生春溫文章七日霧山豹
風雲萬里天池鯤簪花逕入瓊林苑待詔不須金馬門
掛帆更忍須臾別飲盡溪頭酒一樽

去去

去去蓬山夢欲迷黃塵滿目竟何之弱流謾隔三千里
玉樹應生四五枝客至有時還縱酒愁來無處不題詩

夜深無那瓊簫冷吹到孤城月落時

禱雨

上鄭知縣

禱雨南山趨曉征前呵小隊啓嚴城官曹弭節綠蒼巘
神馭鞭龍下紫清兒童定作商羊舞礪壑先聞黑蜥聲
會向雞豚秋社裏老農相與話昇平

空宅

鳥自啼春花自開笙歌聲斷有餘哀綠莎滿徑無人跡
時有山童跨犢來

春暮

幾聲啼鵲夕陽中
萬紫千紅過眼空
吹得花開又吹落
最無情意是春風

夢西湖

湧金門外畫橋西
夢見當年話別時
腸斷春風淚如綫
一聲啼鳥綠楊枝

題春山景

不見人家見白雲
此中疑是避秦民
問津漁父來何晚

開盡桃花萬樹春

題畫

夕陽淡淡柳絲絲
遠浦長天欲暝時
腸斷楚山春雨後
鷓鴣啼向女郎祠

草堂春夢

半簾斜日弄初晴
風定楊花箇箇輕
長日草堂無客至
坐看山鳥啄朱櫻

偶書

春雨花開落滿蹊
秋風落盡只空枝
人生萬事皆如此
縱酒狂歌君莫辭

春城

憶昔春城花滿筵
月明和影弄秋千
如今寂寞風兼雨
幾處人家夜哭天

題畫

江上峯巒翠接天
江邊水竹數家連
滿前幽景誰能詠
喚起襄陽孟浩然

題畫竹

蕭森寒玉氣橫秋
淇綠堂深翠欲流
亂後只今空對畫
月明飢鳳夜啾啾

摘阮圖

北阮遺音久未亡
倚盃傾耳思茫茫
入懷明月水絲冷
啼殺碧梧孤鳳凰

仕女圖二首

為王宗晟賦
次馬孝常韻

香沁黃花露欲凝
凌波微步暮寒生
昭陽玉笛寧王醉

携向瑤臺弄月明

右玉笛
仕女

風剪春香襲舞衣深宮寂寂漏聲遲
瑤花折得無人看

立到長門欲上時

右折花
仕女

墨梅

愛殺春風第一枝無端點素忽成緇
不知月落參橫夜
可是生人夢覺時

夢覺枕上寫愁

燈殘無焰影沉沉細雨窓寒夜向深
夢覺傷心無限事

不知清淚滿孤衾

紅梅

為王彥明賦

海上仙人萼綠華
素襦新染赤城霞
折來猶帶羅浮雪

不信人看是杏花

題栗梢山鼠

翠微東畔栗園西
寂寞茅堂晝掩扉
剝啄鼠銜山果落

叩門疑是採薇歸

無題次韻

蝴蝶飛來也可憐
野花無意競春妍
行雲一去無消息
腸斷青山落照邊

題雙鰕小畫

西塞山前春雨收
桃花新水綠油油
扁舟不見玄真子
容得雙魚自在游

為王生題畫扇

寂寞草堂溪水濱
綠陰無地著紅塵
漁郎鼓枻自來去
不見行吟澤畔人

春寒

晚風吹雨逗春寒
燕啄香泥濕不乾
為恐相思減容色
落紅無意凭闌干

郭倉使春江送別圖

惜別輕舟曉未開
岸花檣燕共徘徊
綠楊折贈何枝好
且盡江頭酒一盃

題畫

秋林葉落溪水碧
屋外山容翠欲流
蕩槳忽驚沙背鴈

一行飛斷楚天秋

又

千林萬壑欲棲烏
隔岸遙山淡欲無
彷彿花溪舊棲處
東隣酒熟夜相呼

又

年豐稻熟酒如川
家住青林落照邊
醉岸烏紗歌白苧
蕩舟新水碧於天

又

離離紅樹濕寒烟
秋雨晴來水拍天
應有漁家住溪曲
笛聲孤起葦花邊

又

山遶長溪水遶村
白沙翠竹護柴門
出門送客抱琴去
新月橫梳掛合昏

閒居

會仙岩東罨畫西
投簪誓欲卜幽棲
曉猿夜鶴休驚怨
如或爾欺如此溪

又

遙山如玉抹脩眉別有禪宮住翠微
北鳥南雲自來去
鐘聲日日送斜暉

又

帆拖飛雨過前灣不信漁樵似我閒
除却焚香讀書外
更無餘事與相關

題牧牛圖

宿麥含胎雉子班
水田耕罷隴牛閒
回頭向犢如相語

春雨紛紛已過山

題魚籃觀音

一个金鱗箇樣鮮
何人能買不論錢
九蓮花裏歸來夜
魚在筠籃月在天

柳枝詞

未放飛花點客袍
野鷺先占最長條
無端裁近章臺路
羞倚春風學舞腰

擬題畫西廂記

西廂花月為誰明一寸芳心萬古情見說雨雲幽會處
至今無樹著啼鶯

無題

黃昏燕子未來家雨哨斜窓濕翠紗賴有東風憐寂寞
落紅時送過墻花

題畫

水光拍拍遠天低雨足秧針綠未齊啼鵲數聲烟墅外
杖藜扶過小橋西

樓閣

月明東閣掛簾鉤
春到江南客正愁
誰在隔樓吹玉笛
不容殘夢向羅浮

又

雲龍山下試春衣
放鶴亭前竟落暉
一色杏花三十里
新郎家去馬如飛

為潘士賢題黃子久畫

雲山千疊萬疊茅屋三家兩家
莫遣問津漁父等閒來

見桃花

題送別圖

男子四方志雲鵬萬里程不知從此去幾日到昆明

為閔生題畫扇

霜枝曾宿鶴雪幹舊棲鸞萬木已搖落相看共歲寒

泊舟

泊舟漁浦暝客懷誰與同烟消天正綠目送孤飛鴻

題畫

水落泉聲近窓迴樾樹多惟應許玄度風雨夜相過

閒居

竹戶曉慵開勢琴有客來祇愁來往數踏破逕中苔

古別離

郎心輕似蝶妾貌美如花花謝蝶飛去南家又北家

又

柳絮入屏帷春風吹不去安得薄情郎纏綿若飛絮

又

蓮心空有意雨態本無情蛛網簷前月尋絲直到明

宮怨

夜永長門靜愁多欲斷腸開簾拜新月歌吹在昭陽

自君之出矣

自君之出矣花鳥幾迴新怕見孤鸞影無心拂鏡塵

雪

天上春應早梨花萬樹開封姨不解惜吹落世間來

妾薄命

桃杏為春開風吹委綠苔東皇渾不管春亦少恩哉



三華集卷十